



ATASSUT
Steen Lynge

UPA15/104-1
12.03.2015

Uunga siunnersuut: Allagaateqarfeqarneq pillugu Inatsisartut inatsisaat nr. xx, xx.xx 2015-imeersaq.

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut Ilaasortaq)

Allagaateqarneq pillugu Inatsisartut inatsisissaattut siunnersuut matumani saqqummiunneqartoq pillugu Atassut-mit imaattumik oqaaseqaateqassaagut:

Nunap oqaluttuarisaanera pillugu innuttaasut kikkulluunniit paasissutissanik pissarsiniarsinnaanerat pisinnaatitaaffiuvoq assortuussutigineqarsinnaanngitsoq. Taamaattumik inuiaqatigiit suulluunniit pisussaaffeqarput kulturikkut kingornussarsiat ataqatigiissaakkamik katersortussaavaat katersugaasiveqarnikkut toqqorsiveqarnikkullu.

EDB-it atorlugit ineriartorneq – ullumikkullu paasissutissat qarasaasiatigut pissarsiarineqartarnerisa ineriartortinneqarsimanerat, assersuutigiinnarlugu pappialanik pisariaqartitsiviujunnaarsimavoq taamaammallu inatsit 1998-meersaq naammagunnaarsimalluni, taamanikkummi inatsimmi allagaatit toqqortassat pappiaraallutillu analogimik tunngaveqarlutik båndiusarput. Qarasaasiatigut pappiaqartaqanngitsumik ineriartortitsisimaneq inuiaqatigiittut ingerlanitsinni sumiluunniit ullumikkut atugaalersimavoq sulinermilu tunngavigineqalersimalluni, tassa allaffissorluni sulinermi pappialartaqanngitsumik ingerlasinnaasoqalersimavoq. Tamatuma malitsigisaanik periarfissaalersimavoq allagaatit toqqortassat qarasaasiat aqutigalugit toqqorterneqarsinnaalernissaat.

Tamannalu iluatsittumik ingerlanneqarsinnaassappat inatsitigut toqqammavigineqartut nutarterneqartariaqalersimapput. Taamaammallu Atassut-mit allagaateqarfeqarneq pillugu Inatsisartut nutaamik inatsiseqalernissaat tapersorsorparput.



ATASSUT INATSIARTUNI

Taamaammat Atassut-mit annertunerusumik oqaaseqanngikkaluarluta siunnersuuti matuma ataatsimiititaliami suliassanngortinneqarnissaa inassutigissavarput.